

reflexion & le Sauvage ayant desisté on me fit asseoir aupres des anciens. Et le Capitaine Manchot mary de la bonne Chrestienne qui mauoit voulu conduire Iusq. la, les harangua et leur dit la part des autres Capitaines, qui suiuoient l'armée que Je ne venois pas come Captif mais comme missionnaire qui reuenoit visiter mon troupeau que leur volonté estoit qu'on me menas dans la Cabane de Conseil & que je fusse a la disposition des agoianders ou gens d'affaires du pays & non pas a la disposition de la soldatesq. ny du peuple ainsy quil me remettoit entre leurs mains Et pour luy quil se retiroit

Un Ancien de la famille de l'ours grand amy des Anglois harangua ensuite fortement disant que Iestois du party du gouuerneur de Canada qui renversoit La Cabane Iroquoise et qui auoit bruslé les bourgs des Tsonnon8a Il en dit tant que Je craignis que le feu qui estoit la ne fut allumé pour me brusler auant que Ientrasse dans le bourg come Ils font quelq⁹. fois, mais il adoucit un peu son discours, sur la fin et dit que puisq⁹. les Capitaines auoient recomandé qu'on me menast en la Cabane de Conseil qui est une Cabane priuilegiée. Il falloit my conduire on donna cette Comission a un home de la nation q'on appelle Skannehok8ie du pays des Loups & naturalisée chez les Iroquoise

Je passay ce mauuais pas sous la Conduitte de ce protecteur qui eut soin desloigner plusieurs Yurognesse qui me vouloient Insulter & arrester en chemin Je fus Etonné de voir la quantité de monde qui se presentoit de tous costez & lon me fit entrer en cette Compagnie dans la Cabane du Conseil qui estoit deuenue Une Cabane de Guerre par